

# Funkcionisanje centara za birački spisak u Bosni i Hercegovini

*...jer nam je stalo!*

Novembar/Studeni 2023. godine

## SADRŽAJ

<b>Sažetak</b> .....	3
<b>O istraživanju</b> .....	4
<b>Rezultati istraživanja</b> .....	5
<b>Objedinjeni prijedlozi predstavnika Centara biračkih spiskova iz BiH za unapređenje njihovog funkcionisanja</b> .....	12
<b>Umjesto zaključka</b> .....	13
<b>Korišteni upitnik</b> .....	14

## SAŽETAK

U svakom demokratskom društvu, kada je u pitanju izborni proces, važno je osigurati ažuriranje Centralnog biračkog spiska (u nastavku CBS-a) kako bi se osigurala pravednost, transparentnost i tačnost izbornog postupka. CBS predstavlja temelj svake izborne aktivnosti, jer na njemu se temelje odluke o pravu glasa i učešću građana/ki u izbornom procesu. Stoga je ključno razumjeti nadležnosti i način funkcionisanja institucija koje su uključene u formiranje i ažuriranje CBS-a.

Cilj istraživanja je identifikovati izazove sa kojima se suočavaju predstavnici Centara za birački spisak u BiH u pogledu ažuriranja biračkog spiska, koje su to sporne tačke u procesu ažuriranja te kako se procesi mogu unaprijediti. Ranija istraživanja Koalicije „Pod Lupom“ su pokazala da je potrebno poboljšati međuinstitucionalnu saradnju, veće uključivanje građana u praćenje izvoda iz CBS-a, objavljivati izvode iz CBS-a i u neizbornim godinama i sl. Ovo istraživanje je bilo jedinstvena prilika da osobe koje rukovode Centrima za birački spisak iznesu svoje viđenje o funkcionisanju, kao i šta je potrebno preduzeti da bi se unaprijedilo funkcionisanje Centara za birački spisak u BiH.

U istraživanju su učestvovali predstavnici/e 87 Centara za birački spisak od 143 koja su kontaktirani i kojima je dostavljen upitnik. Istraživanjem je pokriveno, 47 opština i gradova u Federaciji Bosne i Hercegovine (FBiH), 39 opština i gradova u Republici Srpskoj (RS), kao i Brčko distrikt BiH.

Analizom prikupljenih podataka ustanovili smo nemogućnost u pristupu određenim podacima od strane nadležnih za rad Centara za birački spisak, pa je značajan broj odgovora bio da ili nisu nadležni ili da nemaju podatak. Predstavnici/e 89 % Centara za birački spisak su odgovorili da su im omogućeni svi neophodni uslovi za rad, dok je njih 11% odgovorilo da im nedostaje kvalitetna oprema za rad, da je potrebno zaposliti osobu koja će se baviti samo radom u Centrima za birački spisak, da nemaju adekvatne prostorije za rad i sl.

Predstavnici/e Centara za birački spisak su iznijeli svoje prijedloge za unapređenje funkcionisanja Centara, kao i efikasnije ažuriranje CBS-a. Analiza njihovih odgovora i prijedloga je predstavljena u ovom izvještaju.

Sastavni dio izvještaja je i upitnik korišten u istraživanju.

Koalicija "Pod lupom" koristi priliku da se zahvali svim predstavnicima Centara za birački spisak koji su učestvovali u ovom istraživanju.

## O ISTRAŽIVANJU

Istraživanje ima za cilj dobiti od strane predstavnika/ca Centara za birački spisak u BiH direktne informacije i podatke o funkcionisanju Centara kao i prijedloge za unapređenje njihovog rada, a sve u svrhu što tačnijih podataka na izvodima iz CBS-a.

Dosadašnja istraživanja Koalicije „Pod Lupom“ su pokazala određenu problematiku u funkcionisanju i saradnji između institucija, različitom zakonodavstvu po entitetima i drugim otežavajućim okolnostima za funkcionisanje Centara za birački spisak. Svrha ovog istraživanja je provjeriti sa direktnim učesnicima/ama u ovom procesu šta je to što otežava njihov rad i na koji način se čitav proces može unaprijediti.

Istraživanje je organizovano na način da smo predstavnicima/ama svih Centara za birački spisak u BiH dostavili upitnik koji je popunilo 87 predstavnika/ica Centara. Rezultati istraživanja će biti korišteni za izradu preporuka za unapređenje rada Centara za birački spisak u BiH u svrhu dobijanja relevantnih podataka na izvodima iz CBS-a.


Istraživanje je provedeno u okviru Projekta izbornog integriteta, kojeg u BiH provodi Koalicija za slobodne i poštene izbore „Pod lupom“.

## REZULTATI ISTRAŽIVANJA

Centralni birački spisak je evidencija o državljanima BiH koji imaju biračko pravo u skladu sa Izbornim zakonom BiH i formira se, vodi i koristi za potrebe organizacije i provedbu izbora. CBS se sačinjava i vodi na osnovu podataka iz službenih evidencija o prebivalištu i boravištu državljanima/ki BiH koje vodi nadležni državni organ, drugih javnih isprava i službenih evidencija o državljanima/ka BiH koje vode CBS BiH i drugi nadležni organi i na osnovu javnih isprava i podataka koji se dobiju neposredno od građana/ki. Kako bi informacije u CBS-u bile tačne i ispravne potrebno je redovno ažurirati CBS.

U nastavku rezultati istraživanja dobijenih analizom prikupljenih podataka iz popunjenih upitnika od strane predstavnika 87<sup>1</sup> Centara za birački spisak iz BiH.

Adekvatni resursi za efikasan rad su jedan od preduslova za funkcionisanje Centra za birački spisak. U 9 Centara za birački spisak<sup>2</sup> identifikovani su određeni nedostaci koji se ogledaju u lošoj opremi, nepostojanju posebnih prostorija za rad Centra, potrebom za stalno zaposlenom osobom u Centru i sl. Ipak pozitivno je da većina ispitanika/ica njih (78) smatra da su im omogućeni svi neophodni uslovi za rad.




Od 87 popunjenih upitnika, 89% predstavnika CBS-a je odgovorilo da su omogućeni svi neophodni uslovi za rad, dok je 11% odgovorilo da nisu. Kao razloge su naveli potrebu za stalno zaposlenom osobom, lošu opremu, potrebne posebne prostorije i slično.

U nastavku odgovori predstavnika/ca Centara za birački spisak kada je u pitanju dinamika ažuriranja podataka na CBS-u.


<sup>1</sup> Kostajnica, Kneževo, Sanski Most, Kladanj, Maglaj, Dobož Istok, Prijedor, Srbac, Novi Travnik, Čelinac, Bratunac, Ribnik, Brčko distrikt BiH, Lopare, Pelagićevo, Teočak, Krupa na Uni, Berkovići, Odžak, Čelić, Bosanski Petrovac, Kupres, Petrovac, Stari Grad Sarajevo, Gradačac, Vitez, Istočni Stari Grad, Dobretići, Donji Vakuf, Derventa, Donji Vakuf, Zenica, Banja Luka, Ljubuški, Pale, Oštra Luka, Ilidža, Kotor Varoš, Pale, Hadžići, Novi Grad Sarajevo, Sapna, Cazin, Gračanica, Dobož Istok, Prozor-Rama, Olovo, Žepče, Kozarska Dubica, Velika Kladaša, Čajniče, Teslić, Petrovo, Kreševo, Prnjavor, Goražde, Kalesija, Glamoč, Gacko, Banovići, Novo Sarajevo, Fojnica, Trebinje, Orašje, Kakanj, Ilijaš, Domaljevac-Šamac, Lukavac, Donji Žabar, Tomislavgrad, Istočno Novo Sarajevo, Bihać, Istočni Mostar, Dobož Jug, Vogošća, Novi Grad, Rogatica, Ugljevik, Šamac, Istočni Drvar, Laktaši, Jajce, Trnovo, Vareš, Bosansko Grahovo, Drvar, Tešanj, Stanari.

<sup>2</sup> Maglaj, Pelagićevo, Odžak, Istočni Stari Grad, Kotor Varoš, Čajniče, Lukavac, Vogošća, Jajce




Većina ispitanika/ica, njih 92% odgovorilo je da se ažuriranje CBS-a vrši na dnevnoj osnovi ili do 7 dana, dok je manji broj, njih 7% odgovorilo da im je potrebno od 7 do 15 dana. Samo 1 % ispitanika/ca ažuriranje CBS-a vrši u periodu koji je veći od 15 dana. Sudeći po dobijenim odgovorima može se zaključiti da je dinamika ažuriranja podataka CBS-a na zadovoljavajućem nivou.

Objava izvoda iz CBS-a je značajan segment izbornog procesa iz razloga što se uvidom u isti mogu uočiti pogrešni podaci, određeni nedostaci, te pruža građanima/kama uvid u podatke iz CBS-a. Centralni birački spisak i izvod iz Centralnog biračkog spiska su javni. Pravo uvida u Centralni birački spisak ostvaruje se u skladu sa Izbornim zakonom BiH.



Centralna izborna komisija BiH sačinjava izvode iz CBS-a, sa stanjem na dan raspisivanja izbora, koji se dostavljaju izbornim komisijama i centrima za birački spisak. Obaveza je da se CBS-i izlažu na uvid javnosti u periodu od 120-og do 90-og dana (30 dana) prije dana održavanja izbora u svrhu izrade konačnih izvoda iz CBS-a.



Prema informacijama koje smo dobili od strane predstavnika/ica Centara za birački spisak većina ispitanika/ica je odgovorilo da izlažu izvode u periodu od 30 dana, dok 12 % izvode izlaže u periodu od 60 dana, a 5 % izvode daje na uvid samo 15 dana.


U javnosti se često pojavljivala informacija da se značajan broj lica koja su starija od 90 godina nalazi na biračkom spisku. Zbog toga tražene su informacije koliko se osoba koje imaju od 90 do 99 godina nalazi na biračkom spisku. Veliki broj predstavnika/ca Centara za birački spisak, njih 73% je odgovorio da nema mogućnost pristupa ovim podacima, ali 24 predstavnika/ca Centara su odgovorili da imaju lica koja su stara između 90 i 99 godina na biračkom spisku. Od 24 ispitanika koja su dostavili podatke: 4 nemaju lica navedenih godina na biračkom spisku, 10 ima 1 do 10 lica navedenih godina na biračkom spisku, 3 ima 11 do 20 lica navedenih godina na biračkom spisku, 4 ima 21 do 100 lica navedenih godina na biračkom spisku, 3 ima preko 100 lica navedenih godina na biračkom mjestu (i to 108, 120 i čak 470 lica). U prosjeku to iznosi 22 osobe na biračkom spisku sa licima navedenih godina.

Odgovori na ovo pitanje ukazuju na nemogućnost pristupa traženim podacima od strane većine uposlenika Centara za birački spisak dok kod onih koji su dostavili podatke postoje razlike prije svega zbog veličine opština/gradova i broja upisanih u CBS ali u svakom slučaju zabrinjavaju brojke u 3 opštine/grada gdje se navodi da imaju preko 100 lica između 90 i 99 godina, a u jednom gradu čak 470.

Dodatno, tražene su i informacije koliko se osoba koje imaju 100 i više godina nalazi na biračkom spisku. Veliki broj ispitanika, tačnije, njih 54% je odgovorilo da ne posjeduje tražene podatke iz razloga što ili nemaju uvid ili nije njihova nadležnost. Kao i na prethodno, odgovori na ovo pitanje

su nam prezentovali nemogućnost pristupa traženim podacima od strane više od polovine uposlenika Centara za birački spisak. Njih 40 je dostavilo podatke od kojih 22 nemaju lica navedenih godina, 13 njih imaju 1 do 10 lica navedenih godina na biračkom spisku, jedan ima 11 do 20 lica navedenih godina na biračkom spisku, ali je zabrinjavajuće da 4 opštine/grada ima preko 20 lica koja imaju preko 100 godina na biračkom spisku ( i to 26, 28, 32 i 35).

Procedure ukoliko se na biračkom spisku nađu lica kojima je oduzeto pravo glasa su da se ista brišu sa spiska, a ako se licu pravosnažnom odlukom nadležnog organa vrati poslovna sposobnost, biti će upisano u CBS.



Pitanje se direktno odnosilo na procedure u slučaju da se na biračkom spisku nalaze državljani/ke BiH koji su pravosnažnom odlukom nadležnog organa lišeni potpune poslovne sposobnosti, lica koje su na izdržavanju kazne izrečene od Međunarodnog suda za ratne zločine za bivšu Jugoslaviju i lica koja su pod optužnicom Suda, a koja se nisu povinovala naredbi da se pojave pred Sudom, kao i lica koja su osuđena zbog ozbiljnih povreda humanitarnog prava.

Prema informacijama koje smo dobili, 28% predstavnika Centara za birački spisak je odgovorilo da nema takvih lica, 22% da je ova procedura u nadležnosti CIK-a, 10% da nemaju podataka, dok u 9% Centara smatraju da navedena lica nemaju pravo glasa, a tek 7% da se brišu sa biračkog spiska. Ostalih 24% ispitanika dali su različite odgovore, od toga da postupaju u skladu sa zakonom, da obavijeste nadležne osobe i sl.

Kao što smo već ranije naglasili tačnost podataka iz centralnog biračkog spiska je od suštinskog značaja za integritet izbornog procesa i demokratiju. Upravo zato je važno saznati koji su najčešće uočeni nedostaci. Od 62% Centra za birački spisak dobili smo informaciju da nije bilo nedostataka, dok je najveći broj ispitanih njih 23% navelo kao nedostatak da se umrla lica nalaze na biračkom




spisku. Obzirom da je u proteklom periodu unaprijeđena procedura glasanja putem pošte, samo 3% Centara je prepoznalo ovaj problem, dok 3 % ispitanika ne posjeduje tražene podatke. Ostali odgovori su u procentu od 9% (nepridruženi birači/ice na biračkom spisku, prijava pod starim nazivom ulice, na spisku se nalazilo lice kojem je oduzeta poslovna sposobnost i sl. ).



Kao najčešće mjere i radnje koje CIK BiH preduzima radi otklanjanja nepravilnosti i uspostavljanja tačnosti i ažurnosti evidencija Centra za birački spisak ispitanici su naveli: brisanje i obilježavanje umrlih lica na biračkom spisku, promjenu biračke opcije\* i tehničku pomoć u otklanjanju nedostataka

*\*Državljanin Bosne i Hercegovine koji ima biračko pravo i koji ima status raseljene osobe upisuje se u Centralni birački spisak za osnovnu izbornu jedinicu na osnovu izražene biračke opcije, odnosno mogu birati da li će glasati za opštinu prebivališta prije sticanja statusa raseljene osobe ili za opštinu trenutnog prebivališta/boravišta.*

CIK BiH za sve birače/ice za koje Centar za birački spisak u saradnji s nadležnim matičnim uredom utvrdi da se njihova imena nalaze na zaključenom izvodu iz CBS-a, a provjerama je utvrđeno da se radi o umrloj osobi, za koju je nadležni matični ured izdao izvod iz matične knjige umrlih, u rubrici za potpis glasača stavi oznaku: „\* ”. Daljim istraživanjem pokušalo se ustanoviti koliko je na zaključenom izvodu iz CBS-a bilo označenih umrlih lica, te smo tražili podatke za zadnja tri izborna ciklusa i to 2018., 2020., i 2022. godine.



Samo 37% predstavnika/ca Centara za birački spisak su bili u mogućnosti dostaviti tražene podatke o označenim umrlim licima na biračkom spisku od 2018 godine. Njih 10% je odgovorilo da to nije njihova nadležnost već nadležnost CIK-a/GIK-a/OIK-a. Od ispitanika koji su dostavili podatke: njih 6 nisu imali označenih umrlih lica na biračkom spisku, 6 ih je imalo 1 do 10 takvih lica, 6 ih je imalo 11 do 20 takvih lica, 7 ih je imalo 21 do 100 takvih lica, a jedan preko 100 umrlih lica, i to 204 umrla lica.


Samo 41% predstavnika/ca Centara za birački spisak su bili/e u mogućnosti dostaviti tražene podatke o označenim umrlim licima na biračkom spisku od 2020 godine. Njih 13% je odgovorilo da to nije njihova nadležnost već nadležnost CIK-a/GIK-a/OIK-a. Od onih koji su dostavili podatke, 11 njih nisu imali označenih umrlih lica na biračkom spisku, 6 ih je imalo 1 do 10 takvih lica, 2 ih je imalo 11 do 20 takvih lica, 8 ih je imalo 21 do 100 takvih lica, a 2 ih je imalo preko stotinu umrlih lica na biračkom spisku i to 110 i 198.

Samo 59% predstavnika/ca Centara za birački spisak su bili/e u mogućnosti dostaviti tražene podatke o označenim umrlim licima na biračkom spisku od 2022 godine. Njih 13% je odgovorilo da to nije njihova nadležnost već nadležnost CIK-a/GIK-a/OIK-a. Od onih koji su dostavili podatke, njih 12 nije imalo označenih umrlih lica na biračkom spisku, 14 ih je imalo od 1 do 10 takvih lica, 5 ih je imalo od 11 do 20 takvih lica, 15 ih je imalo od 21 do 100 takvih lica, a 2 ih je imalo preko 100 umrlih lica na biračkom spisku i to 120 i 207.

Za period od 2 mjeseca (od 01.05.2023. do 01.07.2023.) 39 ispitanika/ca je odgovorilo da nema podatak koliko je lica izbrisano sa evidencije CBS-a, dok je njih 49 odgovorilo u skladu sa veličinom opštine/grada i brojem upisanih u CBS. Njih 14 je navelo da u datom periodu nisu imali umrlih lica, 8 ih je navelo da je izbrisano 1 do 10 lica, 8 da je izbrisano 11 do 20 lica, 16 da je izbrisano 21

do 100 lica i 3 koji su naveli da su imali preko 100 obrisanih lica sa CBS-a i to 127, 166 i čak 432 umrla lica.

Jedno od ranije uočenih nepravilnosti je i situacija da se u toku izborne godine u određenim opštinama/gradovima vrši veći broj prijave/odjava građana. Prema informacija koje smo dobili u 10 opština/gradova zabilježene su ove situacije. Od ovog broja u 3 opštine/grada prijave/odjave su intezivirane i više su od 3% ukupnog broja registrovanih birača. U ostalih 7 opština/gradova prijave/odjave su intezivirane ali su manje od 3 % ukupnog broja birača.



## **OBJEDINJENI PRIJEDLOZI PREDSTAVNIKA CENTARA BIRAČKIH SPISKOVA IZ BIH ZA UNAPREĐENJE NJIHOVOG FUNKCIONISANJA**

- ✓ Neophodna je kontinuirana edukacija uposlenika/ca CBS.
- ✓ profesionalizacija radnog mjesta
- ✓ Obezbijediti Centrima za birački spisak kontinuiran uvid u birački spisak.
- ✓ Obezbijediti kvalitetnije materijalno tehničke uslove za rad Centara za birački spisak.
- ✓ Pozivati građane/ke da ukoliko raspolažu informacijom o umrlim licima koja se nalaze na CBS-u, da isto prijave Centru za birački spisak, i dostave raspoloživi dokument kao dokaz o navedenoj činjenici.
- ✓ Automatsko (elektronsko) dostavljanje izvoda iz matične knjige umrlih prema nadležnim službama koje vode evidencije prebivališta. Na taj način bi se ubrzao proces dostave izvoda i brisanja umrlih lica sa biračkog spiska.
- ✓ Bolja međuinstitucionalna saradnja svih nadležnih institucija zaduženih za prikupljanje i ažuriranje podataka na CBS-u.
- ✓ Pojednostaviti aplikaciju koja se koristi prilikom ažuriranja podataka u CBS-u.
- ✓ Unaprijediti saradnju sa matičnim uredima u inostranstvu u smislu efikasnijeg dostavljanja informacija o utvrđivanju činjenice smrti naših državljana.
- ✓ Od Matičnih ureda zahtijevati dostavljanje podataka o umrlim licima unazad 20 godina i uraditi detaljnu provjeru da li se neka od tih lica nalaze na CBS-u.
- ✓ Informatički povezati Matične urede, Centar za birački spisak i CIPS.
- ✓ Potrebno je da nadležne institucije po službenoj dužnosti usljed određenih izmjena (smrt, presuda) pokreću procedure prema Centrima za birački spisak kako bi se ista lica izbrisala sa CBS-a.
- ✓ Da se na godišnjem nivou u saradnji s CIK BiH, prave spiskovi i vrše provjere osoba koje imaju preko 90 godina, a nalaze na izvodu iz CBS.
- ✓ Omogućiti članovima/cama biračkih odbora da označe birače/ice na izvodima iz CBS-a za koje su sigurni da su preminuli, da uvedu to u Zapisnik o radu biračkog odbora i dostave Opštinskim/Gradskim izbornim komisijama, a da CIK ova lica u aplikaciji za naredne izbore označi sa znakom upozorenja koji će ostati do samog brisanja. Kada se podaci provjere i upišu u matičnu knjigu umrlih, da se onda brišu iz evidencije CBS-a.

## UMJESTO ZAKLJUČKA

Redovno ažuriranje Centralnog biračkog spiska je od velikog značaja za očuvanje legitimiteta i vraćanje povjerenja građana/ki u izborni proces u Bosni i Hercegovini, jer se smanjuje mogućnost manipulisanja podacima u svrhu zloupotrebe izborne volje birača/ica. Centri za birački spisak su važna karika za obezbjeđivanje slobodnih i poštenih izbora i podaci dobijeni ovim istraživanjem su od velikog značaja za nastavak unapređenja izbornog procesa u BiH. Istraživanjem je ustanovljeno da su nadležnosti Centara za birački spisak u mnogome ograničene i da je potrebno obezbijediti kontinuiran pristup podacima u svrhu efikasnijeg uočavanja nepravilnosti i djelovanja prema nadležnim institucijama da bi se iste otklonile.

U manjem broju opština/gradova je evidentiran veći broj prijava/odjava građana/ki u izornoj godini što može ukazivati na izborni inžinjeriing koji u manjim opštinama/gradovima može značajno uticati na rezultate izbornog procesa.

Neophodna je efikasnija međuinstitucionalna saradnja između svih nadležnih institucija.

Od izuzetnog je značaja da jedinice lokalne samouprave obezbijede adekvatne materijalne i ljudske resurse za nesmetan i efikasan rad Centara za birački spisak. To je posebno važno u izbornim godinama kada se obim poslova i zadataka Centara usložnjava i zahtijeva veliku posvećenost.

Neophodne su kontinuirane edukacije za uposlenike/ce Centara za birački spisak u svrhu povećanja efikasnosti u radu.

Unaprijediti saradnju sa matičnim uredima u inostranstvu u smislu efikasnijeg dostavljanja informacija o utvrđivanju činjenice smrti naših državljana/ki.

Organizovati kampanju o važnosti i obavezi prijavljivanja činjenica smrti od strane građana/ki u svrhu sprečavanja manipulacije podacima umrlih lica na izvodima iz CBS-a.

Omogućiti građanima/kama elektronski uvid u izvod iz CBS-a i izraditi kanale komunikacije između građana/ki i predstavnika Centara za birački spisak u svrhu što efikasnijeg ažuriranja biračkog spiska.

Potrebno je dalje nastaviti razgovore sa predstavnicima/ama svih institucija zaduženih za ažuriranje Centralnog biračkog spiska u cilju izrade preporuka za unapređenje izbornog procesa i zaštite izborne volje građana/ki u BiH.

Kao što je ranije navedeno, centralni birački spisak predstavlja osnovni stub demokratskog izbornog procesa. Njegova tačnost je ključna za osiguranje osnovnih prava građana/ki i integriteta izbora. Kroz održavanje preciznih podataka o registraciji birača/ica, omogućava se svakom punoljetnom građaninu/ki da ostvari svoje pravo na glasanje. Takođe, tačan birački spisak štiti izborni proces od potencijalnih prevara i manipulacija, čime se čuva transparentnost i poverenje građana/ki u demokratske institucije.

## KORIŠTENI UPITNIK

### Upitnik o funkcionisanju Centara za birački spisak u BiH

#### O upitniku

Istraživanje ima za cilj od strane uposlenika Centara za birački spisak širom BiH, dobiti direktne informacije i podatke o njihovom funkcionisanju, kao i prijedloge za unapređenje njihovog rada, a sve u svrhu što tačnijih podataka na izvodima iz CBS-a.

Rezultati istraživanja će biti korišteni za izradu preporuka Koalicije "Pod lupom" za unapređenje rada Centara za birački spisak u BiH u svrhu dobijanja relevantnih podataka na izvodima iz CBS-a.

#### DIO II upitnika – O anketiranoj osobi

1. Institucija  
\_\_\_\_\_
2. Ime i prezime osobe koja popunjava upitnik  
\_\_\_\_\_
3. Kontakt telefon  
\_\_\_\_\_

#### DIO III upitnika – Pitanja

1. Kojom dinamikom se vrše izmjene u Centralnom biračkom spisku (CBS) od momenta zaprimanja službene informacije o promjeni statusa lica koja utiče na birački spisak:
  - a) na dnevnoj osnovi
  - b) do 7 dana
  - c) od 7 do 15 dana
  - d) više od 15 dana
2. Na biračkom spisku na teritoriji za koju je zadužen Centar za birački spisak za koji ste Vi odgovorni, koliko ima lica koja su starosti:
  - a) od 90 do 99 godina, \_\_\_\_\_
  - b) od 100 i više godina, \_\_\_\_\_
3. Koja je procedura u slučaju da se na biračkom spisku na teritoriji za koju je zadužen Centar za koji ste Vi odgovorni nalaze državljani BiH koji su pravosnažnom odlukom nadležnog organa lišeni potpune poslovne sposobnosti, lica koje su na izdržavanju kazne izrečene od Međunarodnog suda za ratne zločine za bivšu Jugoslaviju, i lica koja su pod optužnicom

Suda, a koja se nisu povinovale naredbi da se pojave pred Sudom, kao i lica koja su osuđena zbog ozbiljnih povreda humanitarnog prava?

---

- 
4. Ukoliko je bilo nedostataka na biračkom spisku na teritoriji za koju je zadužen Centar za koji ste Vi odgovorni, o kojima Vas je obavijestio CIK BiH, koji su najčešći nedostaci u pitanju?
- 

- 
5. Ukoliko je bilo nedostataka na biračkom spisku na teritoriji za koju je zadužen Centar za koji ste Vi odgovorni, koje su najčešće mjere i radnje koje CIK BiH preduzima radi otklanjanje nepravilnosti i uspostavljanja tačnosti i ažurnosti evidencija na teritoriji pomenutog Centra?
- 

- 
6. Na kojim mjestima Centar za birački spisak za koji ste Vi odgovorni, izlaže izvode iz CBS-a?
- a) u prostorijama Centra za birački spisak
  - b) u prostorijama Lokalne izborne komisije
  - c) u prostorijama mjesnih zajednica
  - d) u prostorijama gdje su bila biračka mjesta na prethodnim izborima
  - e) u zgradi lokalne uprave
  - d) na internet stranici organa lokalne uprave
  - e) drugo \_\_\_\_\_

7. U kojem vremenskom periodu Centar za birački spisak za koji ste Vi odgovorni izlaže izvode iz CBS-a?

- a) u trajanju od 15 dana
- b) u trajanju od 30 dana
- c) u trajanju od 60 dana

d)

drugo \_\_\_\_\_

—

8. Koliko je ukupno lica lica izbrisano sa evidencije centralnog biračkog spiska u periodu od 01.05.2023. do 01.07.2023. ? \_\_\_\_\_

9. Koliko ste na zaključenom izvodu iz Centralnog biračkog spiska imali označenih umrlih lica?

Za Opšte izbore 2018 \_\_\_\_\_ (upisati)

Za Lokalne izbore 2020 \_\_\_\_\_ (upisati)

Za Opšte izbore 2022 \_\_\_\_\_ (upisati)

10. Da li na području kojeg pokriva Centar za koji ste Vi odgovorni imate veće prijave/odjave birača u izbornoj godini?

a) Ne, prijave/odjave su na nivou neizbornih godina

b) Da, prijave/odjave su intenzivnije, ali manje od 3% ukupnog broja registrovanih birača

c) Da, prijave/odjave su intenzivnije, broj prijave/odjava je viši od 3% ukupnog broja registrovanih birača

11. Da li su Centru za birački spisak za koji ste Vi odgovorni omogućeni svi neophodni uslovi za efikasan rad (ljudski i materijalni resursi)

Da

Ne

Ako je odgovor Ne, molimo navedite šta nedostaje za efikasniji rad Centra za birački spisak:

\_\_\_\_\_

—



12. Koja su po Vašem mišljenju unapređenja i olakšice koje se mogu uvesti u proces vođenja i ažuriranja CBS-a te efikasnijeg rada Centra za birački spisak?

---

---

---

HVALA VAM ZA SARADNJU I VRIJEME KOJE STE IZDVOJILI ZA POPUNJAVANJE OVOG UPITNIKA!